

海國圖志/卷035



以2024年12月4日从维基文库导出



◎小西洋 (西利未亞洲)

○西阿利未加洲各國

西阿利未加，分兩大區。其一區起自色黎雅爾河以南，至安彌阿河以北，內有九國。一嘉約，二莽孟，三雅爾蘭，四夫達多臘，五河窪爾，六馬臘，七孟薩倫，八雅尼之稔裏，大小各國，同屬一區。佛蘭西人遂合並兩河之名以名其地，曰色黎安彌阿。九國之中，僅嘉約濱海，餘俱腹內。又有西臘氏國相毗連，在色黎雅爾河之北。

其安彌阿河以南至敏惟臘河，又有十四國同區。一霏落司，二夫達雅羅，三額林，四埃阿裏，五阿寒氏，六那知彌，七彌領，八窪裏，九尼門，十根峨，十一鑾峨，十二雅門，十三安峨臘，十四敏維臘，皆濱海之區。地勢平蕪，偶有高阜，亦皆錯出海中。名山巨嶽，盡在腹內。橫數百里，袤長約四千里，彎環參錯，凡二十四國。

山以公山為最巨，由色黎安彌阿至東阿未裏加之悶山，蜿蜒相連。境內河道皆發源於此山之西。有安彌阿河及色黎雅爾河、尼額河。山之南有來阿額蘭尼河、米蘇那河。其源遠而闊者尼額河，由花羅來市直達阿蘭底海；

安彌河流最駛，由色黎安彌阿南入海；色黎雅爾河源較遠，曲折滌洄，由色黎安彌阿北入海；若來阿額蘭尼河、彌蘇臘那河，俱在南隅，由根峨諸口入海。尚有色爾戈河、安薩河，未悉其源委。其海口距內地里數不等，歐羅巴人分疆畫域，惟以河流分界，然亦止知瀕海，莫窺內地。即阿丹地理所載，亦多臆度。

始耶穌紀歲千四百三十年（明宣德五年），西洋有葡萄亞人，舟過麻牙那山麓，棲於阿爾厘島，始訪出北隅之色黎安彌阿，繼尋得南隅之根峨等處。從茲沿海埠頭，悉屬葡萄亞。千六百四十餘年，葡萄亞浸衰，其俄戈之地，即為荷蘭所奪。雖旋取回，而色黎安彌阿又為英吉利、佛蘭西所據。英人即在安彌阿河口立埠，佛蘭西則在色黎雅爾河口立埠。兩國皆有公司，各立炮台。出口貨物惟金及人口最大。至內地情形，英吉利與佛蘭西人講求探溯，尚無端倪，而兩國構兵，遂為中止。

聞其人戶共二千百餘萬口，大都厚唇扁鼻，邪而後仰，色黑髮鬃，不裝飾。無技藝文學，戰鬥雖悍，平居尚淳樸。不習教門，專祀匪底祇之神。或以大樹大石，或以象牙、狗牙、虎牙、羊頭、魚骨，或樹枝繩束等類，隨意而指，即以為匪底祇之神。有供奉在家者，有位置在村莊者，立龕列祭，遇事祈禱。人死多焚財帛，謂資冥用。宰人作牲，以享先靈。嗜音樂，喜歌舞。多畜妻妾，常人多則一、二十，王則動百十計，而阿寒底那和彌兩國酋長竟至數千。民居卑小，門高三尺，鞠躬而入，一妾一門，外圍以牆，上下皆然。惟宮室廡署，略

較爽塏，間施采飾，以別等級。男女皆喜帶手鐲、指環，或金或象，以多為美，即赤貧亦係鐵鐲。麵繪紅白，文身刺膚。以手搏食，飲啖兼數人。產橡樟、楊柳、葡萄酒、無花果、桂皮、甘蔗、桑椹、薯、蒜、栗油、浮石、椰子、鬆柏樹、龍血樹、檸檬、桃、柑、李、蕉、果、西瓜、黃瓜、米粟、棉花、糖、席、材木、金、銅、鋼、鐵、象牙，計象牙歲值銀約十五萬員。

○色黎安彌阿十國

色黎安彌阿一區，內有九國，在西阿未裏加之北，東界蘇厘麻，西界海，南抵安彌阿河，北抵色黎雅爾河。東西距七百餘里，南北距二百五十里。大小九國，又土番三種，一曰野羅甫，一曰付臘司，一曰曼領峨。付臘司種類高大，鼻扁唇厚，麵似橄欖。俗奉馬哈墨回教，性尚平和，周濟老弱疾病，與外來窮旅。遊牧為生，隨帳遷徙。曼領峨種類，麵黑業漁，喜問訊，嗜歌舞，多娶妻妾。妻有過，撻之於市，以示懲警。野羅付種類，麵黑，業紡織，善騎射。計數以五作十，無文字。

嘉約國，即野羅甫，在色黎雅爾河口，瀕海岸，為色黎安彌阿區中之大國。惟一部落曰麻皆，即酋長所居。佛蘭西人貿易其地，遂據河口築炮台，又於對岸之俄黎島設立部落，居人三千，為河口之保障。樹木叢茂，產豐，多商賈。

莽孟國，在色黎安彌阿之東。附近色黎雅爾河內，有那達更山，金鐵相間，掘至數尺許即有金粒，至丈許，則

金粒成團。土番不善支撐礦穴，動致坍塌。色買臘山金在剛石之間，鑿采費工。又有半山出產紅石。

雅爾蘭國，在色黎雅爾河之上流，地處極東，與滿母比鄰。佛蘭西船曾商其地，獲利倍。徒以水土不服，河道難行，恒被劫掠，遂不復深入其地。

夫達多臘國，在色黎雅爾河之下流，距海不遠，河之南北，均其轄地。酋長回教種類，亦不能製其部下。

和窪爾國，近海叢爾之區，酋長蠻野無匹，自稱曰額利墨臘，猶華言王中王雲。

馬臘國，在安彌阿之北，距海甚近。酋長所居，即馬臘部落也。境內有尼利弗裏市埠，設有稅館，先屬葡萄亞國，英吉利奪之，而於安彌阿河口築炮台防守，溯流而上四十里，即比沙部落。英人雖有貿易，究不與內地尼額河相通，故交易不盛。

孟薩倫國，在馬臘國之上，幅員較闊。土番約三十萬，均曼領峨種類。

雅尼國、稔裏國，均小國也。居於孟薩倫之上，厥土墳衍，產穀甲一方。再行四百里，即沙水並湧之地，多鱷魚水鳧，岸則野獸成群，舟楫難駛。

西臘氏國，在色黎雅爾河之北，與前九國毗連為十。河源發自公山，至馬臘之尼力弗裏，出口經西臘氏境內者居半。

○安彌河以南至敏維臘河以北十四國

霏落司國，在嘉約之南。東界蘇裏麻，西界海，南界夫達雅羅，北界嘉約之安彌阿河。土厚產豐，雞鴨蜂蜜尤蕃庶。歐羅巴人至此貿易，向例須曼領峨從中經紀，兩家買賣不得見面，故不能徑與通商。

夫達雅羅國，又名富臘司，在霏落司之東少南。東界額林，西南界海，北界蘇厘麻。幅員約長三百五十里，寬三百里。一鼎磨，一黎彌裏阿，一西耶臘裏阿那，一臘達俄司，四大部落也。酋長居於鼎麻，常領千六百人，虜掠人口，賣與歐羅巴人為奴，祭祀用人為牲。土番皆付臘司種類，俗奉馬賀墨頓教。西耶臘厘阿那，濱臨海岸，為英商市埠。由此至額林邊界，約程二百。臘彌裏阿，在彌斯臘那河口，為彌利堅市埠。南北長二百五十里，寬二三十里，土沃民情，多無賴。產銀鐵、材木、皮、細布、棉花、糖油、象牙、蘇木、黃蠟、胡椒。

額林國，在夫達雅羅國東南。東界埃阿裏，南界海，西界夫達雅羅，北界蘇厘麻。惟一部落曰鼎來，酋長居之。祭祀亦用人為牲，並有夫死而妻自殺墓前以祭者。別有一種教師，曰墨爾裏，能專國中之權。其教師少年離俗，露處深林，修練日久，能作怪異，能通奧妙，非但識其教中之理，並能審識案牘，方可謂之墨爾裏。其地舊屬葡萄亞，今尚有葡萄亞之人與土番雜處，土產胡椒。

埃阿裏國，在額林國之東。南界海，北界梭難，東界阿寒氏，西界額林。領部落二，一曰臘後，濱海口；一曰

耶格蘇，居腹內。臘後所產象牙為最，歐羅巴人以土番獷惡，罕往貿易。土番言語，聲在喉中，若野獸叫嘯，駭人聞聽。阿寒氏，又名峨戈爾，在埃阿裏之東少南。東界那和彌，西界埃阿裏，南界海，北界蘇蘭。幅員萬四千方里，戶百萬口，並奴仆之數，則有四百萬。領部落四，一吉戈司，一依爾彌那，濱臨海邊；一阿加臘，一準曼裏，均在腹地。吉戈司，英吉利商賈所寓，有炮台。東行約五十里，即依爾彌那，為荷蘭市埠，炮台甚多。海岸土疏，多沙而沃。產糖與包粟最豐，產金礦。土番暴躁，好訟。房屋閎整，每村設一會議之所，以高年掌之，審理訟獄。富家多以訟敗產，屠人祭奠，酣宴數日。習俗男逸女勞，負重工作無非女，惟捕魚則男耳。服色尚白，酋長以下，多係金鐲。兵事或戰或和，悉商之四官。春秋二祭，皆屠人祈福。酋長身死，輒戮千人以祭。先拘外國奴仆，並羈禁之。罪囚不足，則虜行人，故入市不敢獨行，恐被虜也。妻妾以多為貴，酋長例有三千，並選姿色，稍忤意，輒戮死。並鬻人口與歐羅巴人為奴，其暴虐甲通洲。然酋長亦知慕歐羅巴之材藝，以教其人民。陳設器物皆精巧。其出口之貨，惟有黃金。屬地甚廣，如領幾、臘阿幾、浯窪掃阿、廣磨四國，皆其所轄。後又征服內地之雅漫陰達、那安麻諸國。

那和彌國，在阿寒氏之東少南。東界彌領，西界寒阿氏，南界海，北界梭蘭。附近海岸，長廣各二百里。其沒海之地曰斯列哥士，華語奴仆岸也，本恢那國之地，其酋長恃富驕淫，遂為那和彌所並。風俗人情，與阿寒氏同，而殘忍更甚。人死不殮不埋，掛於牆壁，任其腐朽。宮室廟宇，覆以人之天靈骨。酋長妻妾，例有三

千。每年傳集番女，挑選一次，上等自留，次者指配番官。鄰近尚有阿那臘、那厄裏、臘俄司諸屬國。臘俄司祈雨，將少婦倒植神前。有犯死罪者，縲首樹杪。阿臘那土產棉花、油、番鹼、瓦器、鐵器。

彌領國，又名彌阿佛臘，在那和彌之南少東，濱海，廣約二百里，與窪裏尼門二國同區。彌領地勢低窪，恒患潦溺。產象牙，俗敬匪底祇神，國人見酋長當如見神，設有幹犯酋長者，已科犯上本罪，再加褻瀆神明規條，施以極刑。

窪裏國，在彌領西南，濱臨內河，地勢卑濕，溪汊紛歧，皆狹不容舟。惟墨臘斯河較闊，源流亦長，直達阿蘭底海。土瘠民稀，風俗略同彌領。

尼門國，在彌領東南，沿河逆流而進，約行六十里，即耶付連部落。酋長蠻野，戰勝即聚其顛骨以造廟宇，以祀匪底祇之神。販鬻人口，每年約二萬。產象牙最多，其次油鹽。

根峨國，在鑾峨之南少東，北界鑾峨，西界阿蘭底海，南抵安臘峨，東界曠野，領小部落三。根我窪在內地，酋長所居也。馬領麻、加敏那，均濱海涯。土番身體短小，麵黑有力。俗惰罕耕種，樹皮為廬，草席蔽體。地曠人稀，村小者百餘人，大者數百人。人分四等，曰頭目，曰錢糧戶，曰耕戶，曰家奴。酋長與頭目多蓄妻妾，販人口，市埠雖在海岸，而所販之人，悉出內地運載而至。

巒峨國，在根峨之北，西抵阿蘭底海，南抵根俄，東北俱界牙門。風土人情，略同根峨。

安莪臘國，在根俄之南，東界曠野，西界阿蘭底海，南界敏雅臘，北界根峨。風土人情，亦同諸部。

敏維臘國，在根峨之南，西界阿南底海，東南俱界荒蕪之地，北界根峨。沿海岸數百里，俱葡萄亞所轄。每年販人口，約二萬計。風俗同前諸部，產上銅。

○重輯 (原無今補)

《每月統紀傳》：利未亞之西，濱海有西爾得國，其地有兩大沙，其一在海中，隨水遊移不定。其一在地，隨風飄泊。所至積如丘山，城郭田畝，皆被壓沒，國人甚苦之。又有工鄂國，地亦豐饒，頗解義理。自與西客往來，多奉真教。其王又遣子往歐羅巴習學文字，講明格

物窮理之學焉 (西得爾國，一作西羈得國，今屬英吉利夷

埠)。

又曰：亞非利加海邊，向有匪徒，駕船載火器，而以美酒玩物，賣與黑面奴，因此誘販人口。又有列國貪利之夷目，侵伐鄰境，虜掠生俘，赴海口販賣。將奴三四百口擁擠下艙，絛縲桎梏，悶不通風，臭氣染病死者，不勝其數。英吉利公會立法嚴禁，巡船到處搜探，一遇載奴之船，即捕送治以死罪。上年十月，兵船巡海，遇有

販奴舟泊於海隅，先放炮招降，既不肯投，遂衝鋒掩殺，一人戰死，六人受傷，竟奪獲其船。赴葡萄亞埠頭，其城之鎮守官強索其販奴船，英軍不允，葡萄亞放炮轟擊，英之水師憤怒，返棹啟咨本國將帥，已領戰船，赴彼雪怨。

《萬國地理全圖集》曰：西亞非利加之海，北係沙地，其黃道南北兩地，深林密箐，瘴氣彌空，外人不服水土，多患病。居民黑面卷發，扁鼻厚唇，愚鈍無知，或崇回教。其土人不服一君，亦不立國家，但各自為族。袤延方圓三百六十萬方里，約計二千萬丁。顏色悅和，揚眉暢氣，並不慮遠。會時鮮衣裘舞，男女用金珠象牙渾身華飾，貧人大半裸體無羞。其僧誘惑庶民，殺人祭神，將各項樹木禽獸為神而拜之，或用妖術靈符，殊可痛恨。其居室檜巢草寮。不用金銀，惟以貨易物。土肥饒產，不待人力，故民皆遊惰，每臨餓乏，則族攻族，類擊類，而相吞。所獲之俘，則賣為奴。外國船到此，以買其人口，將二三百人雜裝船內，駛到各國販賣，以種園耕地。如此黑族，蔓延四海，無處不至。故此英國發義怒，嚴禁販賣。又排巡船恒駛海濱，往來捕治。

葡萄亞國初據此地，為荷蘭所奪。後佛英兩國，開海濱新地，建炮台，但恐山林瘴氣，不敢入內地。西北海邊葡國所據之島，曰馬太拉島，初時遍地深林，焚烈種植，作葡萄酒賣與外國，每年價銀三十萬兩。

加拿利群島，有山嶺，其最高者，百二十丈，名特尼勒山，為船之標準。此嶼歸是班牙國，亦出葡萄酒不少。

綠山頭群島，不毛之地，瘦嶺枯山，其海濱出鹽。群島對面之海邊沙漠，其南方西尼甲江，有佛蘭西炮台，與居民貿易，布匹、金沙、樹膠，每年來船三十隻，貨價銀六七十萬兩。民人大半回回，中有數族，安分務商。

感北亞河，南流入海。有英國商埠，包兌包送之地。此江之南，開英國新地，稱為獅山。產象牙、油蠟、皮、木頭、樹膠，價值銀四十二萬兩。英人如獲奴船，在此釋放。又召教師開學，以傳耶穌之道，雖頑蠻難化，虛費不貲，然援人於水火之禍，不獨保其生命，乃引之履天道。其東南邊，稱曰危尼，中有花旗國新地。

更望南而往，其海濱一曰穀邊，一曰象邊，皆蠻民，猛力好戰，攻接外船，性近禽獸。一曰金邊，乃英荷所建炮台，與土人通商之處。其百姓稍已入化，又立長老治之。金邊之東，有大黑國，稱為亞山地。其國王起兵與英交鋒，又與鄰小國結讐，今亦服之。國王娶妻三千，更赴南販賣人口。再至南則到比紉海邊，居民懍服其王，受死無怨，惟命是聽。另有破島，其埔頭歸是班牙國。其最南方稱曰公我，被葡萄亞所占據，專販人口。所建之城頗大，商頗盛。

《地理備考》曰：塞內岡比國，在亞非裏加州之西，北極出地十度起，至十八度止；經線自西九度起，至二十度止。東至尼給裏西國，西枕亞德蘭的海，南接幾內亞國，北界沙漠。長約二千七百五十里，寬約二千里，地面積方五十五萬，煙戶一京二兆餘口。平原沙漠相間，少山多林。河則塞地加爾河為首，岡比河、那祿河次之，故統名曰塞內岡比國。沃土豐產，穀果、藥材、

金、銅、鹽、琥珀、紋石、象牙皆具。炎瘴特甚，惟五月至八月，陰雨，暑氣稍降。土人色黑髮卷，列酋分攝，或世襲，或選立，各霸一方。所奉回教。國以河得名，故通國分二十小國，在河南北，曰弗達多羅，曰弗達，曰羅，曰弗拉都，曰加孫，曰賓都，曰牙尼，曰弗義尼，曰烏黎，曰登的裏亞，曰分達，曰加科爾達，曰邦布各，曰薩隆，曰加布，曰日的羅弗，曰新，曰烏阿羅，曰巴爾，曰加約爾，曰薩倫。

○西州各國補輯 （此數國《四洲志》無之，今據他書補）

又《地理備考》曰：幾內亞國，其上幾內亞，在亞非裏加州之西南，南極出地一度起，至北十一度止；東至沙漠，西南接亞德蘭的海，北界塞內岡比國及尼給裏西國，長約八千五百里，寬約三千里，地面積方一百零五萬里。煙戶一京餘口，民人多黑，鹵莽無文。本國公山為尼給裏，西及塞內岡比二國分界。海濱低陷，煙瘴觸人。河長者名曰尼日爾、由尼給裏，西貫徹本國，而注於亞德蘭的海。其次曰塞勒郭安薩。田土肥饒，穀果豐稔，土產黃金、珊瑚、琥珀、紋石、甘蔗、煙葉、香料。地氣炎熱，夏秋則陰雨連綿。列酋分攝，各據一方。所奉之教，或拜山河，或奉禽獸，初無一定。技藝缺乏，耕種皆女。通國分為數十小國，其要者曰的馬尼，曰古郎哥，曰蘇尼馬那，曰加布蒙德，曰桑固音，曰加瓦利，曰亞於的亞，曰達可美，曰亞爾達拉，曰巴達給裏，曰拉各斯，餘未及載。

公額國，又名下幾內亞，在亞非裏加州之西南。南極出地一度起，至十七度止；經線自東八度起，至十八度止。東至日牙加地，西接亞德蘭的海，南連星卑巴西亞國，北界上幾內亞國。長約三千八百里，寬約一千四百里，地面積方四十四萬里，煙戶四兆餘口。地勢東方多山，眾河發源於此。其長者曰公額，又名塞勒，四面繞貫，田土最腴，產銅、鐵、甘蔗、胡椒、煙葉、薯粉、象牙等。地氣熾烈。技藝缺乏，貿易稀疏。列酋分攝，不屬別國管轄者。分二十一小國，一羅昂額，一公額，一賓巴，一薩拉，一莫盧阿斯，一虎美，一加三日，一岡各白拉，一何國，一何羅合，一日仍加，一幾蘇阿，一古達多，一古寧加，一當巴，一里波羅，一幾薩馬，一塞拉，一白倫多，一難諾，一比黑。

其屬列國者，曰星卑巴西國，在亞非裏加州之南，南極出地十八度起，至二十五度止；經線自東十度起，莫知所至。西接亞德蘭的海，南連科丁多的亞國，北界公額國。長約二千七百五十里，地面積方約三十四萬里，煙戶約二億餘口。海濱艱險，平原礫薄，一望沙漠，人民蕭條，猛獸充斥，國多無籍遊民。

本州西南臨海幾內亞之地，凡荷蘭、大尼、花旗，各國市埠，皆在其中。隸賀蘭國兼攝者，名厄爾彌那城，建於幾內亞國中。煙戶約一萬口，景色壯觀，商賈接踵，設有總理駐紮其地，餘城皆受節製。隸大尼國兼攝者，曰給裏斯的巴爾。其城在幾內亞國中，地產饒豐，工良商眾。設有總理，駐紮其地。餘城彈丸，皆受節製。隸亞美裏加州花旗國兼攝者，在幾內亞國，門蘇拉多河

濱，曰裏卑利亞。其居民皆由亞美裏加州遷徙，首郡名蒙拉維，學館書庫備具，商賈輻輳。

《外國史略》曰：西亞非利加海邊地，通各國商埠者，一曰西尼安，在曠野之南，廣袤方圓約三萬里。多暑，盛煙瘴。民皆黑面，各有酋長，風俗殊異，好戰鬥。地或沙或壤，物產不由人力。佛蘭西在此海邊開埠，築炮台，在路義峨利等島建邑，土酋多畏其勢。產穀、椰子、棉花、棗、黛青、煙、胡椒等貨。英人及葡萄亞等國亦開埠，然甚微小。

獅山在海濱，長五十五里，闊六十里，卑濕多瀦澤。內地漸高，惟歐羅巴人所居，地多產物。其黑面人，地極荒蕪，土民稠密，飲水食樹根，不肯工作。乾隆四十七年，英人在此開埠，方圓約十七里，嚴禁販賣人口。常調師船巡駛，所獲之奴，即送獅山，設教師，開學館，以施慈政。居民約三萬二千，後小邑鄉里，務藝術，英國每年費銀九十萬兩，以立此港。道光十六年，運入之貨，二十八萬七千兩，運出者二十八萬五千兩。民寡而勤，故地雖褊小，能通商。

一危尼地，在西海濱。其通商各異埠，一曰穀油濱，自山內及米蘇拉加地；一曰象牙濱，自巴馬及亞破羅尼地；一曰金濱，自亞破羅尼及窩他河；一曰奴濱，在窩他河東邊，最要者曰亞山地，曰他何米，曰押他，曰巴他義，曰拉峨等國。亞山地族類，權勢甚重。百姓百萬，織布鍛五金，勇敢殘酷。其君妃嬪四千，淫邪無度，死之日，殺千餘人以殉。可馬西族類，亦在各海濱通商，英吉利、荷蘭、大尼等國，各建炮台，調守兵以

護貿易。屬地褊少，居民亦罕。運出貨價，僅數萬金。此州內地甚廣，部落多，民俗異。外國人未有入之者，故不識其形勢。北方有地曰丁布土，大市也。北賈雲集，駝馬不絕。又布奴，近大湖，亦通商。又副拉，居民稠密，土酋豪健，常領兵以據其鄰國。



本清朝作品在全世界都屬於公有領域，因為作者逝世已經超過100年。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Liouxiao
- Wmrwiki
- Hin
- Tiouraren
- Rocket000
- Jdx

- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)